

est secundo & tertio libro Topicorum. Tamen Theophrastus & Eudemus ejus discipuli multa de hoc Syllogismo tradiderunt, & hos imitatus Severinus Boëtius; Philoponus etiam in hoc loco, in Commentariis capitis XXII. breviter collegit, quacunque de hoc Syllogismo ab aliis sunt tradita. Nonnulla etiam adfert Diogenes Laërtius in vita Zenonis Cittiei; quoniam Stoici multum in hoc genere Syllogismi elaborarunt. Verum Aristoteles hoc loco per Syllogismum hypotheticum intelligit eum, qui revera directus est in aliqua trium figurarum constitutus, quod toto hoc capite probare nititur: tamen quia ipse non concludit quaestionem propositam, sed aliud quippiam, ex quo quaestio proposita ex aliqua hypothese, via quadam obliqua, demonstratur, propterea dicitur hypotheticus. Hunc appello cum Aristotele ex hypothese, relicto verbo Græco, qualia multa sunt in disciplinis, quia non suppetit Latinum, quod omnino ei respondeat. Quamquam interdum id interpretor: ex constituto; hoc enim ad vim ejus verbi magis videtur accedere. Perionius: ex concessione. Tamē ut appareat ex hoc capite, non est omnis Syllogismus ex hypothese, sed ejus quadam species, quæ ab Aristotele vocatur δι' ὁμολογίας, & infra cap. XL. διὰ συνθήκης ὁμολογῆμενος; ex conventiore concessus.

XX. Neque alia est mens Christophori Scheibleri. Postquam enim Oper. Logic. part. IV. cap. X. Tit. II. §. IV. monuisset, per Syllogismum hypotheticum sive ἐξ ὑποθέσεως Aristotelem non intelligere Syllogismum compositum, ipseque porro Syllogismorum ex ὑποθέσεως concludentium species ex mente Philosophi constituisset, §. VII. subjicit: Syllogismi, quem nos hodie hypotheticum vocamus, simplici Syllogismo oppositi nulla aperta vestigia sunt apud Aristotelem. Existimamus igitur hypotheticos Syllogismos, quos Aristoteles explicat, nondum esse Syllogismos compositos, sed alterius generis.

XXI. Manet itaque, neque Syllogismum ἐξ ὑποθέσεως esse illum, qui quocunque modo ad demonstrandam conclusionem assumit ὑπόθεσιν, tanquam principium, de quo principiorum demonstrationis genere Aristoteles agit I. Poster. II.

§. 15.